



5. maj 2014

UPA 2014/99  
Karl-Kristian Kruse

**2015-imiit 2018 ilanngullugu kommuneqarfinni tamani ataatsimik ivigaasanik qallikkamik arsaattarfiliornissaq siunertaralugu Namminersorlutik Oqartussat Kommuneqarfiillu isumaqatigiissusiornissaat isumageqqullugu kiisalu isumaqatigiissummi kommunit ivigaasanik qallikanik arsaattarfiit ingerlanneqarnerannut aserfallatsaaliorneqarnerannullu akisussaaffiup naammassinnaanut isumaqatigiissusiornissaq isumageqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut. (Inatsisartunut ilaasortaq Anders Olsen, Siumut)**

**Siullermeerneqarnera.**

Siumuminngaanniik siunnersuuteqartoq Anders Olsen pingaaruteqarluinnartumik siunnersuuteqarneranut qutsavigaarput.

Siumup pingaartilluinnagaasa ilagaat timersorneq nunatsinni siuarsartuassallugu siunnersuummilu ivigaasanik qallikkanik arsaattarfiliornissamik kommunit Namminersorlutillu Oqartussat suleqatigiinnissaat Siumup tamakkiisumik tapersersorpaa.

Inuit peqqissuunissaannut timersorneq pingaaruteqaannarani pinaveersaartitsinermut sakkutut pingaarnarpaatut taaneqarsinnaavoq, taamaammat innuttaasut timersornermik suli annertunerusumik aallussinissaannut siunniuffiit assigiinngitsut sapinngisarput malillugu Siumumiit tapersersortuarparvut tapersersortuassallugillu.

Innuttaasut peqqissuunissaat pinaveersaartitsinerullu nukittorsartuarnissaa Siumumiit pingaartituaratsigu piviusunngortitsinerlu pingaartitarilluinnaratsigu naammassineqarnissaata tungaanut suleqataassaagut.

Nunatsinni timersortartut nunarsuup sinnerani pissutsinut naleqqussartuarnissaat pingaaruteqarmat 2014-mi aningaasanut inatsisissap 2015-moortup suliarinerani Siumumiit kaammattuutigissuarput Naalakkersuisut ivigaasanik arsaattarfiliornissamat aningaasanik immikkoortinneqartussanik nassaarniaqqullugit.

Taamatut kaammattuuteqarnitsinnut patsisaarnerpaavoq sinerissami arsaattarfiit tamarluinnangajammik nutaanngilinertik pissutigalugu aserfallassimaqimmata nutartertariaqalersimallutillu, minnerunngitsumillu sioqqani pujoralaqaqisumi arsaartuarnerup peqqinnassusia annertuumik apeqquserneqartalersimammat.

Sinerissami arsaattarfiit tamarluinnangajammik ukiunik 30 – 40-nik pisoqaassuseqarput nutarterneqassagunillu akikitsuinnaanaviaratik, taamaattumik akilersinnaanerussaaq arsaattarfiit ullutsinni pissutsinut naleqquttunik nutarterneqarpata.

Ukiuni kingullerni amerlasuuni nunatsinni arsaattartut nunani allamiunut sanilliullugit kinguariartortuarsimanerat miserrattissaanngilaq, tamatumunnga annertunerpaamik patsisaasut ilagivaat ullutsinnut naleqquttunik arsaattarfeqannginneq.



Ilanngullugu aamma oqaatigisariaqarpoq arsaattartut nunani allamiut nunatsinnut unammiartornissartik kajumigiunnaarsimammassuk nunatsinni pitsaasunik arsaattarfeqannginneq patsisigalugu.

Siumumiit oqaatigissavarput Siumumeersup Anders Olsen-ip siunnersutaa tamakkiisumik taperseratsigu. Piumasarissalluguli siunnersuutip ataatsimiititaliami oqaluuserineqarnerani ilanngullugu nalilersorneqassasoq aningaasalersueriaatsip qanoq ittup atorneqarnissaa pitsaanerunersoq.

Arsaattarfiit nutarterlugit aallartittariaqarmata pissusissamisoorpoq illoqarfiit anginerit salliutinneqarpata aallaqaammut. Siumumiit siunnersuutigissavarput ivigaasanik arsaattarfiliornissanut siunnersuummi sammisatsinni siunissaq ungasinnerusoq eqqarsaatigalugu illoqarfiit mikinerit ilanngunneqassasut kaammattuutigigatsigu Naalakkersuisunut taamaalilluni kommunit tamarmik assigiimmik pineqarnissaat qulakkeerneqassammat.

Naggataatigut oqaatigissavarput uggornartuummat ivigaasanik arsaattarfiliorsinnaanermut Inatsisartuni oqllisigineqartarnerat partiinit amerlanerusunik ilalersorneqarneq ajorsimammata, unalu siunnersuut Siumumiit neriuutigaarput amerlasuunik tapersersorneqassasoq taamaalilluni kalaallit timersornikkut nunanut allanut unammisarneranni siunissami inuusuttunut annertuumik iluaqutaallunilu Kalaallit Nunaata avammut kiinnersorneranut saqqumilaarnerulerneranullu aqqutissatsialaammat Siumumit tamakkiisumik tapersiinerput oqaatigeqqillugu qilanaarpugut oqallinnissamut.

Taamatut oqaaseqarluta siunnersuutip ataatsimiititaliamut susassaqtumut ingerlateqqinneqarnissaa Siumumiit inassutigaarput.